

9-§. O'zgartirish shaklida qayta tashkil etishni amalga oshirishda moliyaviy hisobot ko'rsatkichlarini shakllantirishning xususiyatlari

57. O'zbekiston Respublikasining qonun hujjatlariga muvofiq korxonani tegishli tashkiliy-huquqiy shaklga o'zgartirish shaklida qayta tashkil etish tartibi va shartlari ta'sischilarning o'zgartirish to'g'risidagi qarori bilan belgilanadi.

58. O'zgartirish shaklida qayta tashkil etish natijasida tashkiliy-huquqiy shakl o'zgargan taqdirda, mol-mulk va majburiyatlarni huquqiy vorisga o'tkazish bilan bog'liq masalalar topshirish dalolatnomasida tartibga solinishi lozim.

Ta'sischilarning o'zgartirish shaklida qayta tashkil etish to'g'risidagi qaroriga muvofiq, hujjatlarni qayta rasmiylashtirish bilan bog'liq xarajatlar ta'sischilar hisobidan amalga oshirilishi mumkin.

59. O'zgartirish shaklida qayta tashkil etilayotgan korxona vujudga kelgan korxona haqidagi yozuv Reyestrda kiritilishidan oldingi kunda yakuniy moliyaviy hisobot tuzishi chog'ida daromadlar va xarajatlar hisobini yuritish schyotini yopish va o'zgartirilayotgan korxonaning sof foydasi summasini ta'sischilarning o'zgartirish shaklida qayta tashkil etish to'g'risidagi qarori (shartnomasi)da belgilangan maqsadlarga yo'naltirish (taqsimlash) amalga oshiriladi.

60. O'zgartirish shaklida qayta tashkil etish natijasida vujudga kelgan korxonaning dastlabki moliyaviy hisoboti o'zgartirish shaklida qayta tashkil etilayotgan korxona yakuniy moliyaviy hisoboti

ko'rsatkichlarini mazkur BHMSning [61](#) va [62-bandlarida](#) nazarda tutilgan xususiyatlardan kelib chiqib o'tkazish yo'li bilan tuziladi.

61. O'zgartirish shaklida qayta tashkil etilayotgan korxonalarining aksiyalari (ulushlari, paylari)ni vujudga kelgan korxonaning aksiyalari (ulushlari, paylari)ga konvertasiya qilish (ayirboshlash) tartibi to'g'risidagi qaroriga muvofiq, vujudga kelgan korxonaning dastlabki moliyaviy hisobotida shakllantirilgan ustav kapitali aks ettiriladi.

Agar ta'sischilar qarorida vujudga kelgan korxonaning ustav kapitali miqdorini qayta tashkil etilayotgan korxonaning ustav kapitaliga nisbatan, shu jumladan o'z manbalari (qo'shilgan va zaxira kapitali, taqsimlanmagan foydasi va h.k.) hisobiga ko'paytirish nazarda tutilgan bo'lsa, o'zgartirish shaklida qayta tashkil etish natijasida vujudga kelgan korxonaning dastlabki moliyaviy hisobotida ta'sischilar qarorida qayd etilgan ustav kapitali miqdori aks ettiriladi.

Agar ta'sischilar qarorida o'zgartirish shaklida qayta tashkil etish natijasida vujudga kelgan korxonaning ustav kapitali miqdorini kamaytirish nazarda tutilgan bo'lsa, vujudga kelgan korxonaning dastlabki moliyaviy hisobotida ta'sis hujjatlarida qayd etilgan ustav kapitali miqdori aks ettiriladi, o'rtadagi farq esa huquqiy vorisning dastlabki buxgalteriya balansi «Xususiy mablag'larning manbalari» bo'limida «Qo'shilgan kapital» miqdoriy ko'rsatkichi bilan tartibga solinishi lozim.

62. Agar ta'sischilar qarorida nazarda tutilgan ustav kapitalining miqdori vujudga kelgan korxonaning sof aktivlari qiymatiga mos bo'lmasa, dastlabki buxgalteriya

balansi «Xususiy mablagʻlarning manbalari» boʻlimining miqdoriy koʻrsatkichlari quyidagi tartibda shakllantiriladi.

Agar aksiyalarni konvertasiya qilish vaqtida oʻzgartirish shaklida qayta tashkil etish natijasida vujudga kelgan korxonaning sof aktivlari qiymati qayta tashkil etilayotgan korxonaning ustav kapitali miqdoridan koʻp boʻlib qolsa, dastlabki buxgalteriya balansi «Xususiy mablagʻlarning manbalari» boʻlimining miqdoriy koʻrsatkichlari sof aktivlar qiymati miqdorida, ustav kapitaliga va qoʻshilgan kapitalga ajratgan holda shakllantiriladi (sof aktivlar qiymatining aksiyalarning jami nominal qiymatidan oshishi).

Qolgan hollarda, agar vujudga kelgan korxonaning sof aktivlari qiymati ustav kapitali miqdoridan koʻp boʻlib qolsa, oʻrtadagi farq dastlabki buxgalteriya balansi «Majburiyatlar» boʻlimida «Uzoq muddatga uzaytirilgan daromadlar» va «Muddati uzaytirilgan daromadlar» miqdoriy koʻrsatkichlari bilan manfiy gudvill tarzida tartibga solinishi lozim.

Agar oʻzgartirish shaklida qayta tashkil etish natijasida vujudga kelgan korxonaning sof aktivlari qiymati ustav kapitali miqdoridan kam boʻlib qolsa, oʻrtadagi farq dastlabki buxgalteriya balansi «Uzoq muddatli aktivlar» boʻlimida «Nomoddiy aktivlar» miqdoriy koʻrsatkichi bilan gudvill tarzida tartibga solinishi lozim.

63. Asosiy vositalar va nomoddiy aktivlar boʻyicha amortizasiyani hisoblash oʻzgartirish shaklida qayta tashkil etish natijasida vujudga kelgan korxona tomonidan qayta tashkil etilgan korxona (huquqni oʻtkazuvchi) belgilagan unumli foydalanish muddatlaridan kelib chiqib,

ushbu ob'yektlarni qonun hujjatlariga muvofiq
buxgalteriya hisobiga qabul qilish vaqtida amalga
oshiriladi.